

Na osnovu članova 78. , 79. , 80. , 81. i 85. a u vezi sa članom 48. stav (2) Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), članom 116. a) Statuta Univerziteta u Sarajevu, prethodne saglasnosti Ministarstva za obrazovanje, nauku i mlade Kantona Sarajevo za raspisivanje Konkursa broj: 11/05-34-14808-1/20 od 04. 06. 2020. godine i Odluke Vlade Kantona Sarajevo o broju i strukturi kandidata koji se mogu upisati na prvu godinu stručnog studija na Univerzitetu u Sarajevu u studijskoj 2020./2021. godini, Univerzitet u Sarajevu o b j a v l j u j e

**KONKURS  
ZA UPIS KANDIDATA U PRVU GODINU STRUČNOG STUDIJA NA  
UNIVERZITET U SARAJEVU  
U STUDIJSKOJ 2020./2021. GODINI**

Konkurs se raspisuje za upis kandidata u prvu godinu stručnog studija u studijskoj 2020./2021. godini, koji se organizira na fakultetima i akademijama Univerziteta u Sarajevu.

Terminološko korištenje muškog ili ženskog roda u ovom Konkursu podrazumijeva uključivanje oba roda.

Prijava kandidata na Konkurs za upis u prvu godinu stručnog studija provodi se isključivo online putem informacionog sistema eUNSA [www.upis.unsa.ba](http://www.upis.unsa.ba) u dva prijavna roka:

**PRVI PRIJAVNI ROK:**

- **Od 05. 06. do 05 .07. 2020. godine za fakultete/akademije gdje nije predviđeno polaganje prijemnog ispita**
- **od 05. 06. do 28. 06. 2020. godine za fakultete/akademije gdje je predviđeno polaganje prijemnog ispita**

**Na fakultetima/akademijama gdje su predviđeni prijemni ispiti, isti će se održati u periodu: -od 29. 06. do 05. 07. 2020. godine**

Preliminarna rang lista kandidata sa prvog prijavnog roka koji ispunjavaju uslov za upis na fakultete/akademije Univerziteta u Sarajevu bit će objavljena **07. 07. 2020. godine.**

**DRUGI PRIJAVNI ROK:**

- **od 31. 08. do 13. 09. 2020. godine za fakultete/akademije gdje nije predviđeno polaganje prijemnog ispita**
- **od 31. 08. do 06. 09. 2020. godine za fakultete/akademije gdje je predviđeno polaganje prijemnog ispita**

**Na fakultetima/akademijama gdje su predviđeni prijemni ispiti, isti će se održati u periodu:**

- **od 07. 09. do 13. 09. 2020. godine**

**Preliminarna rang lista kandidata sa drugog prijavnog roka koji ispunjavaju uslov za upis na fakultete/akademije Univerziteta u Sarajevu bit će objavljena 15. 09. 2020. godine.**

**U vrijeme trajanja prijavnih rokova kandidati će imati mogućnost izbora do 3 fakulteta/akademije na koje se žele upisati.**

**Na web stranicama Univerziteta i informacionog sistema eUNSA nalazit će se sve informacije i detaljna uputstva o postupku registracije na informacioni sistem eUNSA, te načinu i rokovima za upload dokumenata za online prijavu na Konkurs.**

Visina participacije cijena usluga i školarina Univerziteta u Sarajevu, te fakulteta i akademija u njegovom sastavu utvrđena je Odlukom Vlade Kantona Sarajevo o davanju saglasnosti na visinu participacije cijena usluga, upisnina i drugih troškova studija Univerziteta u Sarajevu, te fakulteta i akademija u njegovom sastavu („Službene novine Kantona Sarajevo“, broj: 19/09, 31/12, 36/12, 4/15, 15/15, 16/18 i 21/18).

Kandidati iz kategorije djece šehida i poginulih boraca, djece ratnih vojnih invalida, djece dobitnika ratnih priznanja i odlikovanja i djece bez oba roditelja oslobođeni su plaćanja troškova upisnine i školarine.

## **OPĆE ODREDBE**

### **I**

U prvu godinu studija u studijskoj 2020./2021. godini kandidati se upisuju u skladu sa Planom upisa studenata koji je sastavni dio ovog Konkursa.

### **II**

Pravo učešća na Konkursu pod jednakim uvjetima imaju:

- državljani Bosne i Hercegovine i strani državljani sa završenom srednjom školom u četverogodišnjem trajanju u Bosni i Hercegovini;
- kandidati koji su srednju školu završili izvan Bosne i Hercegovine, a za koje je nakon postupka priznavanja odnosno ekvivalencije utvrđeno da imaju završeno adekvatno obrazovanje za nastavak školovanja;
- kandidati sa završenom srednjom školom u četverogodišnjem trajanju po međunarodnim programima koji su odobreni od nadležnog ministarstva.

### **III**

Kandidati koji su srednju školu završili izvan Bosne i Hercegovine imaju pravo učešća na Konkursu i prije izvršenog priznavanja odnosno ekvivalencije svjedočanstva o završenom srednjoškolskom obrazovanju u inozemstvu. Ukoliko ovi kandidati prilikom predaje dokumentacije za upis nisu izvršili ekvivalenciju svjedočanstva, fakultet/akademija je dužna

zaprimiti ostalu dokumentaciju i uključiti kandidata u postupak za upis prema odredbama člana 85. Zakona o visokom obrazovanju Kantona Sarajevo („Službene novine Kantona Sarajevo“, broj: 33/17), u kojem se navodi da se kandidat koji ispunjava uvjete konkursa, a nalazi se na rang-listi kandidata koji su položili prijemni ispit u okviru odobrene kvote studenata za upis na taj fakultet/akademiju, može uvjetno upisati u prvu studijsku godinu prije izvršene ekvivalencije svjedočanstva, uz prezentiranje potvrde da je postupak ekvivalencije po njegovom zahtjevu u toku i da kašnjenje u donošenju odgovarajućeg rješenja nije rezultat njegovog propusta koji mu se može staviti na teret.

Kandidate sa završenom srednjom školom po međunarodnim programima koji su odobreni od nadležnog ministarstva, a čiji se rezultati eksterne provjere znanja objavljuju u augustu ili septembru, fakulteti/akademije su dužni uključiti u postupak za upis i prije izdavanja dokaza o položenim ispitima eksterne provjere znanja.

#### IV

Izbor kandidata vršit će se na osnovu Odluke o kriterijima i mjerilima za utvrđivanje redoslijeda prijema kandidata za upis u prvu godinu stručnog studija na Univerzitetu u Sarajevu u studijskoj 2020/2021. godini, koja je sastavni dio ovog Konkursa, kao i pojedinačnih kriterija utvrđenih za vrednovanje ocjena iz predmeta relevantnih za odgovarajući studijski program i vrednovanja rezultata prijemnih ispita ukoliko su predviđeni.

#### V

Verifikaciju online zaprimljenih dokumenata, prijem i upis studenata u prvu godinu studija provodi posebna Komisija za prijem i upis studenata (u daljem tekstu Komisija) koju imenuje Vijeće fakulteta/akademije.

#### VI

Fakulteti/akademije na kojima je predviđen prijemni ispit će na svojim oglasnim pločama/web stranicama objaviti raspored, sadržaj i način polaganja prijemnog ispita, kao i termine objave rezultata prijemnog ispita za svaki prijavni rok.

Termini održavanja prijemnog ispita bit će vidljivi putem informacionog sistema eUNSA.

Prijemni ispit koji se vrši testom ili drugom pisanom formom mora biti u ovjerenom duplikatu, od čega jedna kopija ostaje fakultetu/akademiji, a druga kandidatu.

Na fakultetima/akademijama gdje se prijemni ispit polaže usmeno ili ptem e-platforme (u vidu online usmene prezentacije/provjere znanja) kao i kvalifikacione provjere znanja na akademijama, moraju imati obezbjeđen tonski/serverski zapis.

Svaki kandidat koji putem informacionog sistema eUNSA izvrši prijavu za upis na fakultet/akademiju na kojoj se polaže prijemni ispit obavezan je polagati prijemni ispit; u protivnom njegova prijava neće biti razmatrana.

Komisije fakulteta/akademija na kojima se polažu prijemni ispiti, bodove i rezultate prijemnog ispita unose putem informacionog sistema eUNSA, najkasnije dva dana od dana završetka prijemnog ispita.

## VII

Preliminarna rang-lista svih primljenih i prijavljenih kandidata objavljuje se putem informacionog sistema eUNSA kao i na oglasnoj ploči/web stranici fakulteta/akademije (pod šifrom koju su kandidati dobili prilikom registracije) nakon što je verificira Komisija, najkasnije dva dana od dana polaganja prijemnog ispita, a za fakultete/akademije na kojima se prijemni ispit ne polaže – najkasnije dva dana nakon isteka roka za podnošenje prijave na odgovarajući prijavni rok konkursa.

Na preliminarnu rang-listu kandidati imaju pravo prigovora u roku od tri dana od dana objave iste, o kojoj je vijeće fakulteta/akademije obavezno donijeti odluku u roku od tri dana.

Odluka vijeća po prigovoru je konačna.

Nakon isteka žalbenog roka Komisija je obavezna u eUNSA sistem unijeti i verificirati rezultate po uvaženom prigovoru.

Konačna rang-lista kandidata koji su stekli pravo na upis u svim statusima objavljuje se na informacionom sistemu eUNSA kao i na oglasnoj ploči/web stranici fakulteta/akademije.

## VIII

U roku od sedam dana od dana objave konačne rang-liste, kandidat koji je ostvario pravo na upis je obavezan dostaviti originale uploadovanih dokumenata fakultetu/akademiji i izvršiti upis; u suprotnom smatra se da je odustao od upisa na studijski program za koji je aplicirao, a pravo upisa stiže sljedeći kandidat sa konačne rang-liste koji je ispunio uvjete za upis, do popunjavanja odobrene kvote.

Nakon isteka roka od sedam dana od objave, fakultet/akademija putem informacionog sistema eUNSA kao i na oglasnoj ploči/web stranici fakulteta/akademije objavljuje revidiranu konačnu rang listu kandidata, a pravo upisa u narednih pet dana stižu sljedeći kandidati sa revidirane konačne rang-liste koji su ispunili uvjete za upis.

## IX

Pravo prijave na drugi prijavni rok i polaganje prijemnog ispita imaju svi kandidati koji konkurišu prvi put za upis, kao i kandidati koji su konkurisali u prethodnom roku a nisu se upisali, odnosno ispunili uvjete za upis.

## X

Univerzitet i fakulteti/akademije obavezni su da prije upisa studenata u studijsku godinu na javan i transparentan način, objavom na svojoj web stranici/oglasnoj ploči, upoznaju sve studente sa pravilima studiranja, nastavnim planom i programom, te akademskom titulom i stručnim zvanjem koje se stiže nakon završetka studija.

## DOKUMENTI POTREBNI ZA PRIJAVU NA KONKURS

Prijave na Konkurs za upis u prvu godinu stručnog studija vrše se isključivo online, putem informacionog sistema eUNSA.

Podaci o kandidatima koji su srednju školu završili u Kantonu Sarajevo prilikom registracije povezuju se sa podacima u sistemu EMIS.

Kandidati koji su završili srednju školu po međunarodnim programima dužni su skenirati i uploadovati dokumente koji se ne nalaze u sistemu EMIS.

Kandidati koji su srednju školu završili izvan Kantona Sarajevo dužni skenirati i uploadovati sljedeće originalne dokumente:

- svjedočanstva o završenim razredima srednje škole završene u Bosni i Hercegovini u četvorogodišnjem trajanju odnosno odgovarajuće priznate dokumente za kandidate koji srednju školu nisu završili u Bosni i Hercegovini (ukoliko su dokumenti u postupku ekvivalencije, prilaže se potvrda da je postupak ekvivalencije u toku)
- diplomu o završenoj srednjoj školi,
- izvod iz matične knjige rođenih,
- uvjerenje o državljanstvu i
- dokumente relevantne za utvrđivanje broja bodova po kriterijima, kao i dokumente relevantne za dokazivanje statusa pripadnosti kategoriji djece šehida i poginulih boraca, djece ratnih vojnih invalida, djece dobitnika ratnih priznanja i odlikovanja i djece bez oba roditelja.

U toku jednog prijavnog roka kandidatima će biti omogućeno tri puta mijenjati studijski program.

Prijave podnesene putem informacionog sistema eUNSA poslije roka utvrđenog Konkursom kao i nepotpune prijave, neće se uzimati u razmatranje.

**ODLUKA**

**O KRITERIJIMA I MJERILIMA ZA UTVRĐIVANJE REDOSLIJEDA PRIJEMA  
KANDIDATA ZA UPIS U PRVU GODINU STRUČNOG STUDIJA NA  
UNIVERZITET U SARAJEVU U STUDIJSKOJ 2020. /2021. GODINI**

**Član 1.**

Ovom odlukom utvrđuju se zajednički kriteriji i mjerila za bodovanje i upis kandidata u prvu godinu stručnog studija na (fakultetima i akademijama) Univerziteta u Sarajevu u studijskoj 2020./2021. godini.

Terminološko korištenje muškog ili ženskog roda podrazumijeva uključivanje oba roda.

**Član 2.**

Rangiranje kandidata i prijem studenata u prvu godinu studija vršit će se u zavisnosti od broja bodova koje kandidat osvoji na osnovu:

- općeg uspjeha,
- uspjeha iz maternjeg jezika i pojedinih predmeta značajnih za odgovarajući studij,
- uspjeha iz engleskog jezika (ukoliko se nastava organizuje na engleskom jeziku)
- vrednovanja rezultata prijemnog ispita ukoliko je isti predviđen,
- rezultata ostvarenih na takmičenjima iz predmeta relevantnih za određeni studij ,
- odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja i
- rezultata eksterne provjere znanja.

**Član 3.**

Broj bodova po osnovu općeg uspjeha iznosi maksimalno 20, a utvrđuje se tako što se prosječna ocjena iz svih predmeta u svim razredima, zaokružena na dvije decimale, pomnoži sa 4.

**Član 4.**

Broj bodova po osnovu uspjeha iz predmeta značajnih za odgovarajući studijski program i rezultata postignutih na prijemnom ispitu utvrđuje se kako slijedi:

1. Ukoliko je predviđeno polaganje prijemnog ispita, na osnovu:
  - uspjeha iz maternjeg jezika, odnosno engleskog jezika (ukoliko se nastava organizuje na engleskom jeziku) i grupe predmeta koji su značajni za odgovarajući studij, vrednuje se sa maksimalno 40 bodova i to tako što se prosječna ocjena iz grupe ovih predmeta zaokruži na dvije decimale i pomnoži sa 8,
  - rezultata postignutih na prijemnom ispitu, vrednuje se sa maksimalno 40 bodova.
2. Ukoliko nije predviđeno polaganje prijemnog ispita, na osnovu:

- uspjeha iz maternjeg jezika, odnosno engleskog jezika (ukoliko se nastava organizuje na engleskom jeziku) i grupe predmeta koji su značajni za odgovarajući studij, vrednuje se sa maksimalno 80 bodova i to tako što se prosječna ocjena iz grupe ovih predmeta zaokruži na dvije decimale i pomnoži sa 16.

#### **Član 5.**

Vrednovanje rezultata na osnovu uspjeha postignutog na prijemnom ispitu, kao i spisak predmeta značajnih za odgovarajući studijski program iz kojih se polaže prijemni ispit i način bodovanja po ovom osnovu, fakulteti/akademije će istaći na svojim oglasnim pločama/ web stranicama, a isti će biti dostupni putem sistema eUNSA.

#### **Član 6.**

Za jedno od osvojenih mjesta na lokalnom (općinskom, gradskom) takmičenju učenika srednjih škola dobija se sljedeći broj bodova:

- za osvojeno prvo mjesto – 2 boda,
- za osvojeno drugo mjesto – 1 bod i
- za osvojeno treće mjesto – 0,5 bodova.

Za jedno od osvojenih mjesta na kantonalnom takmičenju učenika srednjih škola dobija se sljedeći broj bodova:

- za osvojeno prvo mjesto – 3 boda,
- za osvojeno drugo mjesto – 2 boda i
- za osvojeno treće mjesto – 1 bod.

Za jedno od osvojenih mjesta na takmičenju učenika srednjih škola na nivou entiteta i Bosne i Hercegovine dobija se sljedeći broj bodova:

- za osvojeno prvo mjesto – 4 boda,
- za osvojeno drugo mjesto – 3 boda i
- za osvojeno treće mjesto – 2 boda.

Za jedno od osvojenih mjesta na međunarodnom takmičenju učenika srednjih škola dobija se sljedeći broj bodova:

- za osvojeno prvo mjesto – 5 bodova,
- za osvojeno drugo mjesto – 4 boda i
- za osvojeno treće mjesto – 3 boda.

Ukupan broj bodova, a koje kandidat dobija po osnovu takmičenja navedenih u ovom članu, formira se na osnovu zbira bodova po svim rezultatima, s tim da se boduju rezultati ostvareni na takmičenjima iz predmeta relevantnim za određeni studij, a čiju verifikaciju će vršiti Komisije.

Za tehničke fakultete, pored navedenog, boduju se i rezultati u okviru takmičenja pod nazivom „Smotra tehničkog stvaralaštva”, koje je organiziralo Ministarstvo za obrazovanje, nauku i mlade Kantona Sarajevo.

Na Fakultetu sporta i tjelesnog odgoja boduju se i rezultati individualnog takmičenja postignuti u vrhunskom sportu, na osnovu kriterija koje utvrdi fakultet, a za akademije rezultati individualnih takmičenja iz okvira te struke, na osnovu kriterija koje utvrdi akademija.

Za kandidate iz država nastalih raspadom bivše SFRJ za bodovanje ostvarenih rezultata na takmičenjima primjenjivat će se odredbe utvrđene u stavovima 1, 2. i 3 ovog člana, uz primjenu principa ekvivalencije (lokalno = općinsko, gradsko; kantonalno = županijsko/regionalno, regije unutar države; entitetsko = pokrajinsko i ostalo; državno = državno).

### **Član 7.**

Kandidatima koji su imali odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja, dodjeljuje se dodatnih 5 (pet) bodova.

Kandidatima sa završenom srednjom školom u četvorogodišnjem trajanju po međunarodnim programima odobrenim od strane nadležnog ministarstva i koji su polagali eksternu provjeru znanja iz predmeta od značaja za studij, dodjeljuju se dodatni bodovi za svaki pojedinačni predmet po sljedećoj shemi:

- ocjena A\* ili A – 3 boda,
- ocjena B – 2 boda i
- ocjena C – 1 bod.

Kandidate sa ocjenom A\*, A, B i C iz stranog jezika fakulteti/akademije su dužni osloboditi obaveze polaganja tog stranog jezika ako je isti uvjet za upis na odgovarajući studijski program.

Bodovanje uspjeha ovih kandidata se vrši na osnovu predviđenih ocjena (forecast grades) koje daju predmetni profesori, uz obavezu dostavljanja sertifikata i/ili diplome prije početka studijske godine.

Ekvivalencija ocjena za učenike sa završenim IB programom vršit će se u skladu sa Odlukom Ministarstva za obrazovanje, nauku i mlade Kantona Sarajevo.

### **Član 8.**

Za fakultete/akademije Univerziteta u Sarajevu koji organiziraju prijemni ispit, način vrednovanja svakog pojedinačnog segmenta prijemnog ispita i minimalan rezultat koji je potrebno ostvariti za upis se utvrđuju posebnom odlukom o kriterijima fakulteta/akademija, a što će biti sadržano u oglasu koji objavljuju fakulteti/akademije.

Na fakultetima/akademijama na kojima se polaže prijemni ispit komisija je dužna da osigura tajnost ispitnog materijala i druge relevantne dokumentacije.



### Član 9.

Kandidati koji, u skladu sa Konkursom, budu primljeni na odgovarajući studijski program, za upis u prvu godinu studija, pored već predatih dokumenata, podnose:

- popunjen zahtjev za upis u kome je tačno naznačen studijski program na koji konkuriše, koji se printa iz informacionog sistema eUNSA,
- upisni, semestralni list i ŠV-obrazac,
- upisnicu – indeks i
- podatke o zdravstvenom stanju – ljekarsko uvjerenje (izdaje ga Zavod za zaštitu zdravlja studenata Univerziteta u Sarajevu).

### Član 10.

Kada se na jedinstvenoj listi kandidata u predviđenoj kvoti upisa nalazi više kandidata koji ostvare isti broj bodova, primaju se svi kandidati u statusu za koji konkurišu, a lista se proširuje za taj broj kandidata.

Kada se na jedinstvenoj listi kandidata, koji su po osnovu kriterija za upis studenata utvrđenih Odlukom Vlade Kantona Sarajevo broj: 02-05-19288-9/09 od 11. juna 2009. godine, u predviđenoj kvoti upisa nađe određeni broj kandidata iz država nastalih nakon raspada SFRJ, lista primljenih kandidata se proširuje za taj broj kandidatima državljanima BiH najviše do 4% kandidata u statusu za koji konkurišu (redovnih, redovnih samofinansirajućih, DL i vanrednih studenata).

Kada izračunati procenat broja studenata u odnosu na maksimalno utvrđenu kvotu kandidata iz država nastalih nakon raspada SFRJ nije cijeli broj, u tom slučaju vrši se zaokruživanje procentualne vrijednosti u korist kandidata na sljedeći cijeli broj.

Ukoliko se na listi kandidata u kvoti do 4% nalazi više kandidata iz država nastalih nakon raspada SFRJ koji ostvare isti broj bodova, primaju se svi kandidati u statusu za koji konkurišu, a lista se proširuje za taj broj kandidatima državljanima BiH.

Kada se na jedinstvenoj listi kandidata u predviđenoj kvoti upisa nađe određeni broj kandidata iz kategorije djece šehida i poginulih boraca, djece ratnih vojnih invalida, djece dobitnika ratnih priznanja i odlikovanja i djece bez oba roditelja, koje su fakulteti/akademije bavezni osloboditi plaćanja troškova školarine, fakultet/akademija ima pravo za broj kandidata koje oslobodi plaćanja školarine proširiti broj studenata koje upisuje u prvu godinu studija kandidatima koji ispunjavaju formalni uvjet za upis i to u statusu studenta koji plaća svoj studij.

Pod jednakim uvjetima iz ovih kriterija prednost imaju:

- djeca boraca-branitelja BiH,

- djeca ratnih vojnih invalida, djeca šehida i poginulih i nestalih boraca-branitelja i umrlih ratnih vojnih invalida,
- djeca organizatora otpora,
- djeca veterana-prvoboraca i
- djeca nosilaca najviših ratnih priznanja.

**(čl. 1, 2, 5. i 24. Zakona o dopunskim pravima boraca-branitelja BiH ("Službene novine Kantona Sarajevo", broj: 45/12 - Prečišćeni tekst 26/14, 46/17, 18/19).**

#### **Član 11.**

Invalidi sa utvrđenim stoprocentnim invaliditetom imaju pravo upisati se jedanput na određeni studijski program na Univerzitetu kao studenti budžetski finansiranih mjesta pod uvjetima:

- da su položili prijemni ispit,
- da su sposobni obavljati praktične zadatke u nastavi,
- da su stekli pravo upisa na odgovarajući stručni studij fakulteta/akademije,
- da su dostavili dokaz nadležne institucije o statusu invalida i procentu invaliditeta.

#### **Član 12.**

Detaljnije informacije o mjestu i vremenu predaje dokumenata za upis, kao i druge relevantne informacije bit će objavljene na web stranicama/oglasnim pločama fakulteta/akademija.

#### **Član 13.**

Postupak provođenja ove odluke vrši Komisija za prijem i upis kandidata.

### **PLAN UPISA STUDENATA U PRVU GODINU STRUČNOG STUDIJA NA UNIVERZITET U SARAJEVU U STUDIJSKOJ 2020. /2021. GODINI**

Redni broj	NAZIV USTANOVE ODSJEK / STUDIJ	Predviđeno trajanje stručnog studija, godine i (E)CTS <sup>a)</sup>	BROJ STUDENATA				
			Redovni studij- troškove studija snosi osnivač	Redovni Studij <sup>b)</sup> - troškove studija snose sami studenti	Vanredni studij <sup>c)</sup>	DL studij <sup>d)</sup>	Strani državljeni

Redni broj	NAZIV USTANOVE ODSJEK / STUDIJ	Predviđeno trajanje stručnog studija, godine i (E)CTS <sup>a)</sup>	BROJ STUDENATA					
			Redovni studij- troškove studija snosi osnivač	Redovni Studij <sup>b)</sup> - troškove studija snose sami studenti	Vanredni studij <sup>c)</sup>	DL studij <sup>d)</sup>	Strani državljeni	Ukupno
1.	FAKULTET ZA KRIMINALISTIKU, KRIMINOLOGIJU I SIGURNOSNE STUDIJE	2 120 (E)CTS	-	-	-	10	-	10
	Privatna sigurnost i zaštita od požara i eksplozija		-	-	-	10	-	10
2.	PRIRODNO- MATEMATIČKI FAKULTET	2 120 (E)CTS	-	80	-	-	-	80
	Odsjek za matematiku							
	Informacione tehnologije		-	80	-	-	-	80
3.	ELEKTROTEHNIČKI FAKULTET	2 120 (E)CTS		50				50
	Odsjek za Računarstvo i informatiku- Razvoj softvera		-	50	-	-	-	50
4.	EKONOMSKI FAKULTET		-	40	-	-	-	40
	Stručni studij - Poslovanje i informacione tehnologije	2 (120)		40	-	-	-	40
	<b>UKUPNO UNIVERZITET U SARAJEVU</b>		-	<b>170</b>	-	<b>10</b>	-	<b>180</b>

Napomena:

Vlada Kantona Sarajevo saglasna je da Univerzitet u Sarajevu, u skladu sa interesom studenata i brojem raspoloživih mjesta, može vršiti preraspodjelu sa odsjeka/smjera na odsjek/smjer i sa jednog studijskog programa na drugi program, ali u okviru odobrenih kvota za fakultet/akademiju.